



Mons Petter Hope
Grimstadvegen 251
5252 SØREIDGREND

Løyve til utsetting av fjelledelgran, fraseredelgran og serbergran

Mons Petter Hope får løyve til å plante fjelledelgran, fraseredelgran og serbergran på gnr. 32 bnr. 1 i Bergen kommune. Det er knytt vilkår til løyvet.

Vi viser til søknadar mottatt 2. mai 2017, om utsetting av fjelledelgran, fraseredelgran og serbergran på gnr. 32. bnr. 1 i Bergen kommune.

Informasjon i søknaden

Det er søkt om å sette ut til saman 275 tre av treslaga fjelledegran, fraseredelgran og serbergran på om lag 1 daa av gnr. 32 bnr. i Bergen kommune. Formålet med utsettinga er juletreproduksjon.

Utsettingsområdet er ein liten haug med grunnlendt, overflatedyrka mark som er vanskeleg å slå. Området rundt er dyrka mark som blir pussa ned med beitepussar. Elles er det spreidd med lauvskog og små plantefelt med gran i området.

I følgje søknaden har Bergen kommune uttalt seg positivt til å omdisponere frå overflatedyrka areal til skogproduksjon på det aktuelle arealet.

Fylkesmannens vurdering

Søknaden er handsama etter forskrift om utsetting av utanlandske treslag til skogbruksformål, med heimel i naturmangfaldlova. Ved utøving av offentleg mynde som kan påverke naturmangfaldet skal prinsippa i naturmangfaldlova §§ 8-12 ligge til grunn for sakshandsaminga, jf. § 7.

Informasjon i søknaden, kunnskap om treslaga frå Artsdatabanken og registrerte førekomstar av trua artar og naturtypar frå Naturbase og Artskart ligg til grunn for handsaminga, jf. naturmangfaldlova § 8. Til saman dannar dette eit godt grunnlag for å fatte eit vedtak, og førevar-prinsippet i naturmangfaldlova § 9 er difor tillagt lite vekt.

Fjelledelgran (*Abies lasiocarpa*) er eit hardført og skuggetolande treslag frå fjellområde i Nord-Amerika. Det vart innført for tømmerproduksjon på Vestlandet rundt 1900, og utgjer eit samla skogareal i Noreg på anslagsvis 2 km². Treslaget har størst betydning for

juletreproduksjon. Artsdatabanken har vurdert fjelledelgran til å ha låg økologisk risiko og det står ikkje på svartelista.

Fraseredelgran (*Abies fraseri*) kjem frå fjellområde Appalachene i det søraustlege USA. Arten er lite planta i Noreg og er ikkje risikovurdert av artsdatabanken.

Serbergran (*Abies omorika*) kjem frå eit lite område på Balkan og er ikkje prioritert for risikovurdering av artsdatabanken. Dette er grunngitt med at treslaget er ikkje fortrengrer andre artar, ikkje påverkar naturtypar i særleg grad og er ikkje kjent for overføring av sjukdommar eller parasitter.

Det er ikkje registrert sårbare eller sjeldne artar eller naturtypar i eller nær utsettingsområdet. Ingen av treslaga er svartelista, og sidan det her er snakk om juletreproduksjon blir trea hogde før dei set frø. Utsettinga har lite omfang, og faren for spreiding frå feltet blir handtert gjennom vilkåra til løyvet. Vi meiner difor at utsettinga vil auke den samla belastninga på økosystemet i liten grad, jf. naturmangfaldlova § 10. Det er ikkje grunn til å anta at utsettinga vil medføre vesentlege uheldige følgjer for naturmangfaldet, jf. utsettingsforskrifta § 7.

Dersom brot på vilkåra i løyvet fører til skade på stadeige naturmangfald må tiltakshavar bere kostnadane for å rette opp i dette, jf. naturmangfaldlova § 11.

Val av driftsmetodar og teknikkar skal etter § 12 ta best mogleg omsyn til naturmiljøet, slik at resultatet gir dei beste samfunnsmessige resultata. Utover dei føringar som følgjer av anna lovverk, som til dømes for bruk av sprøytemiddel og gjødsel, har vi ikkje spesielle merknadar til dette i denne saka.

Vedtak

Mons Petter Hope får løyve til å plante ut til saman 275 tre av treslaga fjelledelgran, fraseredelgran og serbergran på gnr. 32 bnr. 1 i Bergen kommune. Det er knytt vilkår til løyvet:

- Løyvet gjeld områda avteikna på kartvedlegget til søknaden.
- Alle tre må hoggast før dei set frø og seinast innan 15 år frå planting.
- Det må etablerast rutinar for internkontroll etter § 10 i forskrifta.
- Det skal førast logg over produksjonen der tal på tre, treslag og årstal for planting kjem fram.
- Dette dokumentet må gjerast kjent og bli overført til ny grunneigar ved eventuelt eigarskifte.
- Dersom juletreproduksjonen blir avvikla må alle trea hoggast.

Vedtaket er heimla i forskrift om utsetting av utanlandske treslag.

NB!

Eit løyve gitt i medhald av forskrift om utsetting av utanlandske treslag til skogbruksformål gir ikkje automatisk omdisponering av dyrka og dyrkbar mark til skogproduksjon. Ved spørsmål om omdisponering kan du kontakte kommunen.

Klagerett

Alle med rettsleg klageinteresse kan klage på vedtaket innan tre veker, jf. forvaltningslova §§ 28 og 29. Klagen skal stilast til Miljødirektoratet, men sendast til Fylkesmannen i Hordaland.

Med helsing

Olav Overvoll
seniorrådgjevar

Jørgen Aarø
rådgjevar

Brevet er godkjent elektronisk og har derfor inga underskrift.